


Departamento di Cultura cu 35 aña di Servicio Cultural na Aruba



ORANJESTAD- Departamento di Cultura Aruba (DCA) a cuminsa dia 30 di september 1978 como Instituto di Cultura Aruba (ICA). Riba e fecha ey DCA a keda oficialmente institui pa Gobierno Insular di Aruba di e tempo ey. Gobierno Insular di Aruba a acerca Sr. Hubert (Lio) Booi, kende tabata Hefe di e Departamento pa Cultura y Educacion, pa cuminsa traha riba e

vision y e idea pa prepara e pueblo culturalmente como parti di e preparacion pa Aruba su Status Aparte. Sr. Booi cu tambe tabatin e pensamentu aki como un di su metanan principal, a haya e tarea for di Gobierno Insular di e tempo ey pa cuminsa cu preparacion y coordinacion pa institui un departamento di cultura cu ta cay bou di Gobierno Insular di Aruba. Sr. Booi a duna un proposi-



cion na Gobierno Insular pa duna e departamento di servicio cultural aki un nomber na Papiamentu. E nomber na Papiamentu lo mester bira Instituto di Cultura Aruba (ICA). E preparacion pa dicho departamento, no tabata facil ya cu no tabata tin ni un presupuesto, y tampoco personal na su disposicion. Despues Sr. Booi bin haya mas personal acerca, esta un commies, un secretaria, un bode y un persona pa haci limpieza. E preparacionnan a dura for di april 1978 pa 30 di september 1978. Riba e fecha aki, 30 di september 1978, ICA a keda oficialmente institui e tempo ey pa Sr. Nelson O. Oduber, kende tabata Diputado di Cultura cu tambe a haci e aper-

tura oficial. Na principio, ICA a cuminsa den edificio caminda awe 'San Pedro Paviljoen' ta situa, na unda antes tabata e prome hospital di Aruba, 'San Pedro Hospital'. Na 1979, Gobierno Insular di Aruba a cumpra e edificio di Maria Convent, for di Fundacion Santa Catharina y ICA a muda pa e edificio aki. For di e edificio historico aki, Gobierno Insular di Aruba por a logra su meta di cuminsa prepara e pueblo di Aruba culturalmente pa su Status Aparte. Sr. Booi, e mesun aña aki, a yega e edad pa baha cu pensioen, esta riba 25 di juli 1979. Pero mirando e trabounan cu mester a keda realisa y aunke cu Sr. Booi mester a

baha cu pensioen, el a keda fungi como Hefe di ICA te cu 1 di juli 1980. Asina ICA a conoce su prome director, kende te awe ta gosa di un aprecio grandi di dicho Departamento di Cultura Aruba y di pueblo en general.

Despues di 35 aña DCA ta sigui cu e tarea di implementa un maneho cultural na bienestar di e pueblo di Aruba. Un proyecto cu DCA sigur ta orguyoso di dje ta 'Gang di Arte' cu e aña aki a conoce su di 7 edicion cual ta forma parti tambe di e celebracion di 35 aña di servicio cultural na Aruba. DCA, tin di remarca, cu un proyecto manera 'Gang di Arte' ta un instrumento ideal pa logra esaki. Ta di aplaudi nos hobennan cu durante nan vakantie ta hinca hopi tempo den algo positivo den cual nan ta demostra hopi talento, creatividad y curashi. DCA ta señalá cu educacion ta hopi importante pa nos, pasobra un pueblo educa ta un pueblo bon prepara pa e dia di mañan. Cu e talentonan demostra di e participantenan e biaha aki tur riba nan mes ta heroe, nan mester considera nan mes un ganado. DCA un biaha mas ta felicita e ganadonan di e di 7 edicion di Competencia Hubenil Gang di Arte. Tambe ta felicita e team organisado, empleadonan di DCA, Atelier '89, Cas di Cultura, docentenan invita, cuerpo di hurado, maestronan di ceremonia, grupo di Corsou, invitadonan special di e proyecto Luna Yen, Tropical Bottling Co. y prensa pa tur sosten. Na cada mayornan di e participantenan pa duna aporte y haci posibel pa cada soño di e hobennan aki, por a bira realidad. Pa bien na e participante. □

